




HADIS 40

OBJEKTIF KURSUS KESELURUHAN:

- a) **Memahami konsep Hadis 40:** Peserta akan memperoleh pemahaman mengenai Hadis 40 termasuk sejarah penyusunan, latar belakang pengarangnya serta peranan Hadis 40 dalam tradisi hadis Islam.
- b) **Mengenalai hadis-hadis utama dalam agama Islam:** Peserta akan mengenali dan mempelajari teks-teks Hadis 40 yang paling terkenal, memahami konteks dan makna setiap hadis serta aplikasinya dalam kehidupan seharian.
- c) **Menghayati pengajaran Hadis 40:** Peserta akan mengkaji dan memahami pengajaran moral, etika dan hukum yang terkandung dalam Hadis 40 serta implikasinya terhadap amalan hidup.
- d) **Mengaplikasikan hadis dalam kehidupan:** Peserta akan mempelajari cara-cara untuk mengaplikasikan pengajaran Hadis 40 dalam kehidupan peribadi, keluarga dan masyarakat serta mengintegrasikan nilai-nilai hadis dalam tindakan sehari-hari.
- e) **Menilai kepentingan Hadis 40 dalam agama Islam:** Peserta akan menilai kepentingan Hadis 40 dalam memahami syariat Islam secara menyeluruh serta peranannya dalam memperkuat iman dan amalan dalam masyarakat Muslim.

HADIS KE-21: IMAN DAN ISTIQAMAH

عَنْ أَبِي عَمْرٍو - وَقِيلَ أَبِي عَمْرَةَ - سُفْيَانَ بْنِ عَبْدِ اللَّهِ الثَّقَفِيِّ رَضِيَ اللَّهُ عَنْهُ، قَالَ: قُلْتُ:

Diriwayatkan daripada Abu 'Amru, satu pendapat mengatakan Abu 'Amrah – Sufyan bin Abdullah al-Tsaqafi r.a. berkata, “Aku berkata:

يَا رَسُولَ اللَّهِ، قُلْ لِي فِي الْإِسْلَامِ قَوْلًا لَا أَسْأَلُ عَنْهُ أَحَدًا غَيْرَكَ. قَالَ: قُلْ آمَنْتُ بِاللَّهِ،
ثُمَّ اسْتَقِمَّ.

‘Wahai Rasulullah, beritahulah kepada aku tentang Islam dengan satu ungkapan yang tidak perlu aku tanyakan lagi kepada sesiapa pun selainmu.’ Rasulullah SAW menjawab, ‘Katakanlah, ‘Saya beriman kepada Allah’, kemudian hendaklah kamu beristiqamah.’”

رَوَاهُ مُسْلِمٌ.

Hadis ini diriwayatkan oleh Muslim.

Antara pelajaran dan pelaksanaan inti pati hadis dalam kehidupan yang boleh diambil ialah:

1. Hadis ini mengumpulkan maksud iman secara menyeluruh:
 - a) Pengakuan dengan lidah bahawa “saya beriman kepada Allah SWT.”
 - b) Kepercayaan dalam hati bahawa “saya beriman kepada Allah SWT.”
 - c) Perbuatan dengan anggota badan dengan istiqamah melakukan perintah Allah SWT.
2. Hadis ini juga menunjukkan bahawa iman dan istiqamah merupakan suatu perkara yang besar dan penting kerana sahabat yang bertanya juga telah memastikan agar tidak perlu lagi ditanya kepada orang lain.
3. Perkataan istiqamah mengandungi unsur mujahadah. Istiqamah terhadap agama tidak akan datang melainkan selepas kesusahan dan kesabaran. Istiqamah juga membawa erti seseorang itu berterusan mentaati Allah SWT dari aspek akidah, perkataan dan perbuatan.
4. Istiqamah merupakan satu tuntutan untuk berpegang teguh dengan perintah Allah SWT dalam setiap keadaan, sama ada ketika susah atau senang, berseorangan atau berkumpul mahupun menang atau kalah. Oleh itu, istiqamah ialah keteguhan diri yang tidak mungkin boleh ditukar ganti dengan keduniaan kerana matlamat yang dicari ialah keredaan Allah SWT.
5. Hadis ini juga menggesa supaya segala kebaikan atau amalan termasuk pekerjaan dan perkhidmatan yang dilakukan hendaklah dalam istiqamah dengan menghindarkan segala sifat-sifat mazmumah seperti malas, putus asa, semangat yang seketika dan mudah luntur kerana ia boleh menafikan maksud dan matlamat istiqamah.

SENARAI RUJUKAN PENTING

1. Al-Arba'un al-Nawawiyyah cetakan Dar al-Minhaj.
2. Al-Kafi dan Tatmim al-Kafi: Syarah Hadis 40: Dr. Zulkifli Mohamad al-Bakri.
3. Syarah Hadis 40 Al-Nawawiyyah: Zulhimi Mohamed Nor, Mohd Yusuf Ismail, Amiruddin Mohd Sobali dan Ahmad Sanusi Azmi.
4. Syarah Hadis 40 Imam Ibnu al-Aththar: Terjemahan dan Huraian Dr. Mohd Solleh bin Ab. Razak.
5. 40 Hadis Imam Nawawi: Sebuah Huraian untuk Dunia Semasa: Ali Jum'ah: Terjemahan Lajnah Penterjemahan APT.
6. Modul Penghayatan Hadis 40 Imam Nawawi: Kementerian Pendidikan Malaysia.
7. Al-Wafi fi Syarh al-Arba'in Al-Nawawiyyah: Dr. Mustafa al-Bugha.
8. Jami' al-'Ulum wa al-Hikam: Ibn Rajab al-Hanbali.